

## ԿԱՐԾԻՔ

Էդգար Սուրենի Կարապետյանի «Անչափահասների նկատմամբ կատարվող բռնի սեռական հանցագործությունների քրեաիրավական բնութագիրը Հայաստանի Հանրապետությունում» վերտառությամբ, ԺԲ.00.05 (Քրեական իրավունք և կրիմինալոգիա, քրեակատարողական իրավունք) մասնագիտությամբ իրավաբանական գիտությունների թեկնածուի գիտական աստիճանի հայցման համար ներկայացված ատենախոսության վերաբերյալ

Անչափահասների նկատմամբ կատարվող սեռական հանցագործությունները իրավամբ դասվում են առավել վտանգավոր և լատենտային հանցագործությունների շարքին: Հանցավոր վարքագծի նշված դրսևորման ընդհանուր ծավալում՝ իրենց հակաիրավական և հակաբարոյական բնույթով առանձնանում են անչափահասների նկատմամբ կատարվող բռնի սեռական հանցագործությունները, որոնք վտանգում են ինչպես երեխայի սեռական ազատությունն ու անձեռնմխելիությունը, այնպես էլ նրա ֆիզիկական և հոգեկան բնականոն զարգացումը, անձի բարոյական ձևավորման և սոցիալիզացիայի գործընթացը: Հանցավորության քննարկվող տեսակի դեմ անգիջում պայքարը յուրաքանչյուր իրավական պետության առանջնահերթություններից է: Այդ պայքարը ենթադրում է նպատակամղվածություն, բարձր ինտենսիվություն, պետական և ոչ պետական կազմակերպությունների և հասարակության ներգրավվածություն, համագործակցություն, անհրաժեշտ և արդիական գործիքակազմի կիրառում, հատուկ պատրաստված կադրերի ներգրավվածություն և բազմաթիվ այլ գործոններ, որոնց անհրաժեշտ և բավարար համադրությունը միայն կարող է ապահովել ցանկալի արդյունք:

Հարկ է նկատել, որ երեխաների նկատմամբ կատարվող բռնի սեռական հանցագործությունների ուսումնասիրությանը նվիրված տեսական աշխատանքներ ՀՀ-ում գրեթե բացակայում են, իսկ կատարված փոքրաթիվ հետազոտությունները ի գորու չեն համալիր կերպով ներկայացնելու նշված հիմնահարցին առնչվող բազմաթիվ խնդիրները, օրենսդրական բացերը, գործնական բարդությունները:

Վերոգրյալը հավաստում է ընտրված թեմայի արդիականությունը և գիտական նորոպթը: Ատենախոսության գիտական նորոպթն արտահայտվում է նաև նրանում, որ պաշտպանության ներկայացվող դրոպթներում հեղինակը ներկայացնում է մի շարք առաջարկներ, որոնց ներմուծումը ՀՀ քրեական օրենսդրության մեջ կարող է էապես նպաստել քննարկվող հանցատեսակների դեմ քրեաիրավական պայքարի արդյունավետության բարձրացմանը: Պետք է նշել, որ հեղինակի առաջ քաշած շատ գաղափարներ ու դրոպթներ լուծում են տալիս մի շարք խնդրահարոպց տեսական և գործնական հարցերի և կարող են նպաստել հանցագործությունների



որակման գործընթացի առավել դյուրինացմանը, ապահովել իրավական որոշակիության սկզբունքի կենսագործումը:

Հետազոտության առավել արժեքավոր տեսական ու գործնական նշանակություն ունեցող գաղափարներն ու դրույթները, մեր կարծիքով, հանգում են հետևյալին:

Հեղինակի կողմից համակողմանիորեն ուսումնասիրվել և վեր են լուծվել «սեռական ազատություն» և «սեռական անձեռնմխելիություն» եզրույթները, դրանք քննարկվել են տարբեր իմաստներով, անդրադարձ է կատարվել այդ կատեգորիաներին առնչվող դոկտրինալ մեկնաբանություններին, ինչի հիման վրա հեղինակի կողմից կատարվել են ինքնուրույն և տրամաբանական եզրահանգումներ: Առաջարկվել է օրենսդրորեն սահմանել «սեռական հանցագործությունների» հասկացությունը՝ դրանք համաբնույթ այլ հանցատեսակներից հստակ տարբերակելու նկատառումներով: Էսոր ուսումնասիրության է ենթարկվել արտասահմանյան տարբեր երկրների քրեական օրենսդրությամբ նախատեսված սեռական հանցագործությունների համակարգը, հատուկ ուշադրություն է դարձվել երեխայի դեմ ուղղված սեռական հանցագործությունների և, հատկապես, բռնի սեռական հանցագործությունների օրենսդրական կառուցվածքի առանձնահատկություններին: Արտասահմանյան փորձի ուսումնասիրության հիման վրա կատարվել են օրենսդրական փոփոխությունների մի շարք առաջարկություններ, որոնք կարող են էապես նպաստել ՀՀ քրեական օրենսդրության կատարելագործմանը: Մասնավորապես՝ հեղինակը նշում է, որ որպես բռնի սեռական հանցագործությունների որակյալ տեսակ արտասահմանյան մի շարք երկրների քրեական օրենսդրությամբ սահմանվում է հանցանքը վերընթաց ազգակցական կապերն օգտագործելով կատարելը, ծնողի, որդեգրողի կամ այն անձի կողմից կատարելը, ում դաստիարակության կամ խնամքի ներքո է գտնվում երեխան, կամ ումից երեխան գտնվում է ծառայողական կամ աշխատանքային կախվածության մեջ: Վերջինիս կարծիքով համաբնույթ որակյալ տեսակ պետք է նախատեսել նաև ՀՀ քրեական օրենսդրությամբ: Բացի այդ՝ հեղինակը նշում է, որ սեռական ներթափանցմամբ զուգորդված սեքսուալ բնույթի բռնի գործողություններն օժտված են առավել բարձր հանրային վտանգավորությամբ, քան սեռական բռնության այն տեսակները, որոնք կատարվել են առանց ներթափանցման: Հեղինակն առաջարկում է օրենսդրորեն նախատեսել բռնի անառակաբարո գործողությունների հանցակազմ, որի տուժող կարող են համարվել նաև չափահասները և բռնի սեքսուալ բնույթի այն գործողությունները, որոնք զուգորդված չեն ներթափանցմամբ, որակել այս հանցակազմով:

Ուսումնասիրելով սեռական հանցագործությունների, բռնի սեռական հանցագործությունների և անչափահասների նկատմամբ կատարվող բռնի սեռական հանցագործությունների շարժընթացը՝ հեղինակը հանգել է հետևյալին,



որ դրանք ունեն բացասական միտումներ և անհրաժեշտ է չեզոքացնել մի շարք անբարենպաստ գործոններ, որոնք կարող են հանգեցնել հանցավորության այս դրսևորման հետագա աճին: Ներկայացվել է նաև սեռական հանցագործությունների դասակարգումը, ինչի հիման վրա՝ հեղինակն առաջարկել է երեխայի դեմ ուղղված սեռական հանցագործությունները ՀՀ քրեական օրենսդրությամբ նախատեսել առանձին գլխով, ելնելով դրանց օբյեկտի առանձնահատկություններից:

Ուշագրավ է այն հանգամանքը, որ հեղինակն առաջարկում է որպես «անօգնական վիճակի» տարիք սահմանել 14 տարեկանը, գործող 12 տարեկանի փոխարեն՝ հիմնավորելով այդ հանգամանքը ՀՀ ազգային որոշ առանձնահատկություններով, դաստիարակության և սոցիալիզացիայի յուրահատկություններով: Առաջարկվում է նաև կիրառել այսպես կոչված՝ «Ռոմեոյի ու Ջուլիետի» օրենքը և անչափահասի դեմ ուղղված սեռական հանցագործությունը չհամարել ծանրացնող հանգամանքով կատարված, եթե սեռական հարաբերությունների մասնակիցների տարիքային տարբերությունը չի գերազանցում 2 տարին: Սա իհարկե վիճելի դրույթ է, բայց, անշուշտ, արժանի է ուշադրության:

Կարելի էր նշել ատենախոսության մեջ առաջ քաշված և մեր կարծիքով հիմնավոր ու ճիշտ լուծում ստացած մի քանի այլ դրույթների մասին, սակայն այսքանն էլ բավարար է հավաստելու, որ գրախոսվող թեկնածուական ատենախոսությունն արժեքավոր աշխատանք է:

Պետք է նշել, որ ատենախոսության հեղինակին հաջողվել է գիտական պատշաճ մակարդակով խոր և համալիր հետազոտություն իրականացնել: Դրան նպաստել է հատկապես այն հանգամանքը, որ նա լայնորեն օգտվել է դատական պրակտիկայի նյութերից, վիճակագրական ծավալուն տվյալներից, խոր վերլուծության է ենթարկել այլ երկրների օրենսդրական փորձը, միջազգային փաստաթղթերը, քննադատական վերլուծության է ենթարկել ՀՀ քրեական օրենսգրքի համապատասխան դրույթներն ու դրանց կիրառման պրակտիկան: Դա թույլ է տվել հեղինակին բացահայտելու ՀՀ օրենսդրության մեջ առկա բացերն ու թերությունները և հետաքրքիր առաջարկություններ ներկայացնելու՝ ուղղված քննարկվող իրավանորմերի օրենսդրական կատարելագործմանը և լրամշակմանը:

Ատենախոսության անվիճելի արժանիքներից է այն, որ կատարված հետազոտությունների հիման վրա հեղինակի ներկայացրած առաջարկությունները հիմնավոր են և կարող են էապես նպաստել իրավակիրառ պրակտիկայի ու ՀՀ քրեական օրենսգրքի կատարելագործմանը:

Այսպիսով, կարելի է հավաստել, որ սույն թեկնածուական ատենախոսությունը խիստ արդիական և արժեքավոր աշխատանք է: Դրանում առաջին անգամ ՀՀ-ում խոր և բազմակողմանի հետազոտության են ենթարկվել անչափահասների նկատմամբ կատարվող բռնի սեռական հանցագործություններին վերաբերող



հիմնախնդիրները. տրվել է անչափահասների նկատմամբ կատարվող բռնի սեռական հանցագործությունների ընդհանուր բնութագիրը, ուսումնասիրվել է այս հանցատեսակների դեմ քրեաիրավական պայքարի արտասահմանյան փորձը, վեր են հանվել դրանց օբյեկտիվ և սուբյեկտիվ հատկանիշները, ինչպես նաև առաջարկություններ են արվել քրեական օրենսդրության կատարելագործման ուղղությամբ:

Ընդհանուր առմամբ բարձր գնահատելով կատարված աշխատանքը, կցանկանայինք որոշ նկատառումներ արտահայտել դրա կապակցությամբ, որոնք հանգում են հետևյալին:

1. Ուսումնասիրելով անչափահասների նկատմամբ կատարվող բռնի սեռական հանցագործությունների միտումները՝ հեղինակը դրանք համադրել է ԱՊՀ երկրներում առկա հանցավորության միտումների հետ: Մինչդեռ աշխատանքի շրջանակներում հեղինակի կողմից ուսումնասիրվել են արտասահմանյան մի շարք զարգացած իրավական համակարգ ունեցող երկրներում երեխայի դեմ ուղղված բռնի սեռական հանցագործությունների առանձնահատկությունները, օրենսդրական նկարագրման յուրահատկությունները, քննարկվող հանցագործությունների որակմանն առնչվող հիմնախնդիրները: Այս համատեքստում ցանկալի կլիներ, որպեսզի հեղինակի կողմից ուսումնասիրվեին նաև քննարկվող հանցատեսակների միտումները արտասահմանյան երկրներում: Այս պարագայում՝ համեմատական վերլուծությունն առավել ամբողջական և լիարժեք տեսք կունենար և թույլ կտար անչափահասների նկատմամբ կատարվող բռնի սեռական հանցագործությունների միտումներն ընկալել ոչ միայն տարածաշրջանային, այլև համաշխարհային մակարդակով:
2. Աշխատանքի շրջանակներում հեղինակի կողմից օգտագործվել են ՀՀ դատական պրակտիկայից վերցված մի շարք նյութեր, ինչն, իհարկե, ողջունելի է: Սակայն ցանկալի կլիներ, որպեսզի օրինակներ ներկայացվեին նաև դատավարական ավելի վաղ փուլերում առկա խնդրահարույց հանգամանքների, արարքի որակման հետ կապված օրենսդրական խոչընդոտների և բացերի վերաբերյալ: Այս լույսի ներքո, կարծում են, նպատակահարմար կլիներ նաև ուսումնասիրել արտասահմանյան դատական և քննչական պրակտիկայի նյութերը՝ համադրելով դրանք տեղական փորձի հետ:
3. Աշխատանքի շրջանակներում հեղինակը նշում է, որ ՀՀ-ում, ըստ պաշտոնական վիճակագրության սեռական հանցագործությունները կազմում են ընդհանուր հանցավորության 0.4-0.7 %-ը: Նշվում է նաև, որ հեղինակի կողմից կատարված ուսումնասիրությունը վկայում է, որ




առկա են մի շարք բացասական միտումներ, որոնք կարող են մոտեցնել հանցավորության այս դրսևորման ծավալը տարածաշրջանի այլ երկրների ցուցանիշներին: Սակայն թե ի՞նչ բացասական միտումների և գործոնների մասին է խոսքը, որոնք կարող են հանգեցնել հանցավորության այս դրսևորման աճին, ըստ էության, չի նշվում, հստակ ներկայացված չեն նաև այն միջոցառումները, որոնք կարող են չեզոքացնել այդ բացասական միտումները:

Պետք է նշել, սակայն, որ նշված նկատառումները ամենևին չեն նսեմացնում աշխատանքի արժանիքները, մասնակի բնույթ են կրում, պայմանավորված են աշխատանքն էլ ավելի լիարժեք և ամփոփ տեսնելու ցանկությամբ, իսկ որոշ դեպքերում մեր անձնական կարծիքն են ներկայացնում և չեն կարող էապես ազդել աշխատանքի ընդհանուր դրական գնահատականի վրա: Ատենախոսական հետազոտության արդյունքների հավաստիությունը կասկած չի հարուցում: Ատենախոսությունը կատարված է պատշաճ գիտական մակարդակով, ունի հարուստ էմպիրիկ և աղբյուրագիտական հիմք:

Սեղմագրի բովանդակությունը համապատասխանում է ատենախոսության բովանդակությանը:

Վերոգրյալի հիման վրա կարելի է հավաստել, որ «Անչափահասների նկատմամբ կատարվող բռնի սեռական հանցագործությունների քրեաիրավական բնութագիրը Հայաստանի Հանրապետությունում» վերտառությամբ թեկնածուական ատենախոսությունը գիտական նորույթ պարունակող, ինքնուրույն, ավարտուն գիտական աշխատանք է, որը լիովին բավարարում է և համապատասխանում է ՀՀ ԲՈԿ-ի «Հայաստանի Հանրապետությունում գիտական աստիճանաշնորհման կանոնակարգի» 7-րդ կետի պահանջներին, իսկ դրա հեղինակը՝ Էդգար Սուրենի Կարապետյանը արժանի է իր կողմից հայցվող իրավաբանական գիտությունների թեկնածուի գիտական աստիճանին՝ ԺԲ.00.05 (Քրեական իրավունք և կրիմինալոգիա, քրեակատարողական իրավունք) մասնագիտությամբ:

ԵՊՀ իրավագիտության ֆակուլտետի  
քրեական իրավունքի

ամբիոնի վարիչ, իրավ. գիտ. դոկտոր, պրոֆեսոր  Ա. Գաբրիելյան

Ա. Գաբրիելյանի ստորագրությունը  
հաստատում եմ

ԵՊՀ իրավագիտության ֆակուլտետի դեկանի  
տեղակալ, իրավ. գիտ. դոկտոր, պրոֆեսոր



Ս. Խաչիկյան